

### 1.3.3

*Idem A. ad Taurum pp.*

De his clericis, qui praedia possident, sublimis auctoritas tua non solum eos aliena iuga nequaquam statuet excusare, sed etiam pro his, quae ab ipsis possidentur, eosdem ad pensitanda fiscalia perurguerit. universos namque clericos possessores dumtaxat provinciales pensitationes fiscalium translationesque faciendas recognoscere iubemus.

*Data epistula prid. k. lul. Mediolano  
Constantio A. X et Iuliano C. III cons.*

[a. 360]

### 1.3.4

*Idem A. ad Taurum pp.*

Officiales rationales, si exhibitione cursus seu primipili necessitate neglecta, intersersa etiam ratione fiscali ad clericatus honorem putaverint transeundum, ad priorem condicionem retrahantur.

1 ¶ Si vero obnoxii ratiociniis vel necessitatibus non sint, sub notione iudicum officii consentientibus, si id probabilis vitae studium postularit, transferantur nec cessionem metuant facultatum.

2 ¶ Quod si clandestinis artibus putaverint inrependum, duas concedant liberis aut, si proles defuerit, propinquis e propria substantia portiones tertiam sibimet retenturi: si vero propinquorum necessitudo defuerit, geminae portiones officii in quibus militant relinquantur, portione tertia tantummodo retenta.

*D. IIII k. Sept. Tauro et Florentio cons.*

[a. 361]

### 1.3.5

*Imp. Iovianus A. Secundo pp.*

Si quis non dicam rapere, sed attemptare tantum matrimonii iungendi causa sacratissimas virgines ausus fuerit, capitali poena ferietur.

*D. XI k. Mart. Antiochiae Ioviano A. et Varroniano cons. [a. 364]*